


集部輯佚文獻彙編

翟金明 主編

國家圖書館出版社

82



集部輯佚文獻彙編

82



蕭山 田餘融

國家圖書館藏書
P000

(南朝梁)簡文帝蕭綱撰 (明)張燮輯

梁簡文帝御製集十六卷附錄一卷

(卷六——十六附錄)

明天啓崇禎刻《七十二家集》本

第八十二册目錄

別集(八十二)

南朝梁(十六)

梁簡文帝御製集十六卷附錄一卷(卷六——十六附錄) (南朝梁)簡文帝蕭綱撰 (明)張燮輯

卷六 一

卷七 二七

卷八 五一

卷九 七九

卷十 一一三

卷十一 一五三

卷十二 一八七

卷十三 二二三

卷十四 二五九

卷十五	二八九
卷十六	三二一
附錄	三五一
梁簡文帝集 (南朝梁)簡文帝蕭綱撰 (明)葉紹泰輯	三七九
梁簡文文抄一卷 (南朝梁)簡文帝蕭綱撰 (明)李賓輯	三八九
簡文帝 (南朝梁)簡文帝蕭綱撰 (清)嚴可均輯	四九七

梁簡文帝御製集卷之六

梁太宗簡文皇帝蕭綱著

詔

改元詔

蓋天下者至公之神器在昔三五不獲已而臨
蒞之故帝王之功聖人之餘事軒冕之華儻來
之一物太祖文皇帝含光大之量啓西伯之基
高祖武皇帝道洽二儀智周萬物屬齊季薦瘥
彝倫剝喪同氣離入苑之禍元首懷無厭之欲

乃當樂推之運因億兆之心承彼倚角雪茲讐
耻事非爲已義實從民故功成弗居卑宮菲食
大慈之業普薰汾陽之詔屢下于茲四紀無得
而稱朕以寡昧哀矜孔棘生靈已盡志不圖全
僂俛視陰企承鴻緒懸旌履薄未足云喻痛甚
愈遲諒闇彌切方當玄默在躬栖心事外卽王
道未直天步猶艱式憑宰輔以弘庶政履端建
號仰惟舊章可大赦天下改太清四年爲大寶
元年

卽位赦詔

朕以不造夙丁閔凶大行皇帝奄棄萬國攀慕
號躋身靡所猥以寡德越居民上烝烝在疚
罔知所托方賴藩輔社稷用安謹遵先旨顧命
遺澤宜加億兆可大赦天下

營莊陵詔

簡皇后窀穸有期昔西京霸陵因山爲藏東漢
壽陵流水而已朕屬值時艱歲饑民弊方欲以
身率下永示敦朴今所營莊陵務存約儉

令

與劉孝儀令

劉遵爲晉安王宣惠雲麾二府記室轉南徐州治中後爲雍州復引爲安北諮議參軍及王立爲皇太子仍除中庶子大同元年卒太子深悼惜之與遵從兄孝儀令

賢從中庶奄至殞逝痛可言乎其孝友淳深立身貞固内含玉潤外表瀾清美譽嘉聲流於士友言行相符始終如一文史該富琬琰爲心辭章博瞻玄黃成采旣以鳴謙表性又以難進自

居未嘗造請公卿締交榮利是以新沓莫之舉
杜武弗之知自阮放之官野王之職栖遲門下
已踰五載同僚已陟後進多升而怡然清靜不
以少多爲念確爾之志亦何易得西河觀寶東
江獨步書籍所載必不是過吾昔在漢南連翩
書記及忝朱方從容坐首良辰美景清風月夜
鷁舟乍動朱鷺徐鳴未嘗一日而不追隨一時
而不會遇酒闌耳熱言志賦詩校覆忠賢權楊
文史益者三友此實其人及弘道下邑未申善

政而能使民結去思野多馴雉此亦威鳳一羽
足以驗其五德比在春坊載獲中晤博望無通
賓之務司成多節文之科所賴故人時相媿偶
而此子溘然實可嗟痛惟與善人此爲虛說天
之報施豈若此乎想卿痛悼之誠亦當何已往
矣柰何投筆惻愴吾昨欲爲誌銘并爲撰集吾
之劣薄其生也不能揄揚吹噓使得騁其才用
今者爲銘爲集何益旣往故爲痛惜之情不能
已已耳

劉孝儀上東宮啓附

亡從弟遵百行無點千里立志同氣三荆之
友假寢十起之慈皆體之於自然行之如俛
拾自碣宮陪宴釣臺從幸攀附鱗翼三十餘
載茫昧與善一旦長辭劍匿光芒璧碎符采
躬搖神筆親動妙思雖每想南皮書憶阮瑀
行經北館歌悼子侯不足輩此深仁齊茲舊
愛

與湘東王論王規令

王規字威明爲太子中庶子大同二年卒太子出臨與湘東王令

威明昨宵奄復殂化甚可痛傷其風韻適正神
峰標映千里絕迹百尺無枝文辯縱橫才學優
贍跌宕之情彌遠濠梁之氣特多斯實俊民也
一爾過隙永歸長夜金刀掩芒長淮絕澗去歲
冬中已傷劉子今茲寒孟復悼王生俱往之傷
信非虛說

卹孔休源手令

金紫光祿大夫孔休源立身中正行已清恪昔
歲西浮渚宮東泊汾壤毗佐蕃政實盡厥誠安
國之詳審公儀之廉白無以過之奄至殞喪情
用惻怛今須舉哀外可備禮

與衡山侯恭手令

雍州蠻引魏寇詔恭赴援除雍州刺史
太宗少與恭游特被賞狎至是手令

波士流骯髒有關輔餘風黔首扞格但知重劒
輕苑降胡惟尚貪恠邊蠻不知敬讓懷抱不可
阜白法律無所用施願克實邊戍無數遷徙謀
候惟遠箱庾惟積長以控短靜以制躁早蒙愛
念敢布腹心

臨城公夫人停省太子妃令

繡鴈之儀旣稱合於二姓酒食之會亦有因不
失親若使榛栗服修贄饋必舉副笄編珈盛飾
斯備不應婦見之禮獨以親闕頃者敬進醢醢
已傳婦事之則而奉盤沃盥不行侯服之家是
知繁省不同質文異世臨城公夫人於妃旣是
姑侄宜停省